

Date – 01/08/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizorama raltlan awmte kutzia leh mit-naute lakkhawm hna chu Serchhip, Lunglei, Champhai leh Hnahtial district-ah te tan a ni.
2. Supply department hotute chuan mipui nitin mamawh, petrol, diesel, eirawngbawlna gas leh buhfai dinhmun a tha thawkhat niin an sawi.
3. Election Commission of India chuan Vice President thlan hun atan thlaleh September ni 9 a ruat
4. Bengaluru Special Court chuan Janata Dal (Secular) hruaitu leh MP hlui Prajwal Revanna chu pawngsual thubuaiah thiamloh a chantir.



BIOMETRIC ENROLMENT

Mizorama raltlan awmte kutzia leh mit-naute lakkhawm hna chu Serchhip, Lunglei, Champhai leh Hnahtial district-ah te tan a ni.

Serchhip district-ah hian nimin piah (Nilaini) atang khan Myanmar leh Bangladesh atanga raltlante biometric enrolment hi tan a ni a, SDO (Sadar) Pi Rebecca Laldinmawii Hrahsel sawi danin July ni 30 hian Serchhip Chanmary VC huam chhunga Myanmar raltlan awmte kutzia leh mitnaute thla lakkhawm hna hi tan a ni a. Nimin leh vawiinah hna chawlhsan rihin kar leh Thawhtanni leh Zirtawpni-ah chhonzawm leh a ni ang. Serchhip district-ah hian veng leh khaw 30-ah raltlan an awm a. Myanmar raltlan hi mipa puitling 198, hmeichhia 150 leh naupang 299, an vaiin 647 an awm a. Thenzawl khawpui bikah Bangladesh raltlan mipa puitling 75, hmeichhia 73 leh naupang 118 awmin an vaiin 266 an awm a ni. Serchhip district a raltlan awmte hi relief camp-ah awm lovin an chhungkhat laina leh thiante bel deuh vek an ni a, mi in luaha awm an awm bawk.

July ni 30 vek khan Lunglei district-ah pawh Myanmar raltlan 70 chuang awmna Ramthar camp atangin an tan a, vawiin hian zawhfel hman an beisei chungin then khat Aizawl lama sikul kalte erawh chu hun remchanga bawhzui leh tura dah a ni a. Kar leh lamah chhonzawm chhoh zel tum a ni. Lunglei district-ah hian Myanmar raltlan hi 1,991 an awm ni a chhut a ni. Myanmar raltlan awm tam berna Champhai district-ah chuan nimin, Ningani khan Champhai khaw chhunga VC 3-ah biometric enrolment hi tan a ni na a, khawl a chiang kuan loh avangin a takin an kalpui thei meuh lova, vawiin lamah pawh khawl a that loh avangin chhonzawm theih a ni lo. Champhai district-ah hian raltlan hi mi 13,586 an awm mek ni a chhinchhiah a ni.

Hnahtial district-ah pawh Hnahtial District Level Committee on Displaced Persons hmalakna in nimin atang khan Hnahtial District chhung, Thingsai khuaah Biometric Enrollment of Displaced Persons kalpui tan a ni a, a tah tawlin khaw dangah pawh kalpui chhonzawm zel tura ruahmanna siam a ni a. Bawrh sap pisa chhinchhiah danin tun dinhmunah hian Hnahtial district

chhung khaw sawm hnih-ah Relief Camp 13 leh mi in luah Myanmar raltlan mihring 701 an awm mek a. Thingsai-ah hian tam berin mi 230 an awm a, raltlan zingah hian puitling 436 (mipa 198 leh hmeichhia 238) bakah naupang kum tling lo 265 an awm mek a ni.

Tun dinhmunah hian Mizoramah Myanmar raltlan hi mi 32,504 an awm mek ni a chhinchhiah a ni a. Champhai district-ah tam berin, Lawngtlai district leh Siaha district te'n an dawt a ni. Kum 2021 February ni 1-a sipai-in Myanmar sorkar thuneihna an pawng lak hnu thla khat vel atang khan Myanmar atang hian raltlan awm tanin an tam lai ber phe chu an tling hial a ni.

(DESK)

<><><>

CM, PATHAK MEET

Chief minister Pu Lalduhoma'n leh Special Secretary & Member, Task Force on Deregulation and Reduction of Compliances Burden Pu KK Pathak te chu an inkawm a, dan paih thawl ngai la awmte an sawi dun.

Chief Minister hian Pu KK Pathak leh a thawhpuite chu an hmalakna chuan India ram leh Mizoram tan rah tha a thlen a beisei thu a lo hrilh a. awlsam zawka sawrkarin thil a kalpui theih na'na an hmalakna tlangpuite lo hrilhin, kal dan tha zawka a awm thurawn an dawng thei reng tih a sawi baw. Pu KK Pathak hian nimin lama Mizoram Chief Secretary nena an inkawmna leh Mizoram kalphung an zir dante Pu Lalduhoma hnenah hian a thlen a. Mizoram sorkar hmalakna chu a tha thawkhat hle a, amah erawh chu dan paih thawl ngai tur dang pawh a la awm nual thu sawiin India ramah Micro Small & Medium Enterprises bul tanna leh hmasawn zelna tur remchang tam se a duh thu sawiin MSME hmasawna lamah thenawm ram aiin an chak lo deuh an ti a, ram economy chawikan na'n MSME chu chak zawka kaltir an duh tih an sawi bawk..

Inkawmna-ah hian Building Law awlsam zawk leh hmasawna hnathawh dawn a Forest Clearance awlsam zawka neih a nih theih dan tur te pawh an sawidun a. He Task Force hi sawrkar laipuiin MSME te tana awlsam zawka sawrkar kaltir dan zawng tura a din a ni a. Cabinet Secretary chu Chairman niin central leh state sawrkar kalphung siamthat ngai te zira a tul anga insiamrem dan tur rawttu an ni.

Hemi hma, nimin khan chief secretary Pu Khilli Ram Meena kaihhruai inkhawmah hian state-in deregulation a kalpui mek chungchang hi thlirho a ni a, phurrit tihziaawmna lam hawia state sawrkarin dan hrang hrang, a bikin sumdawna lam hawia a lo zam te siam that dan tur chungchang pawh sawiho a ni. Department hrang hrangte'n sumdawna awlsam zawka kalpui theihna tura dan tul lo siamte an tihbo theih dan tur chungchang an sawiho a ni. Pu KK Pathak chuan department hrang hrang hotute chu an department theuhah hetiang mipuite tana thiltih awlsamna tur leh sumdawngte leh thil siamna din turte tana awlsam zawk leh rang zawka tihfel a nih theih nana hmala zel turin a fuih a ni.

(DIPR)

<><><>

MUHCS

Wawiin atang khan Mizoram Universal Healthcare Scheme (MUHCS)-a la inziaklut lo te tana inziahlunna hun August thla chhung atan hawn tan leh a ni.

August thla chhunga inziaklut te hian inziahlun man pangngai let a tam chawiin inziahlun a ngai tawh dawn a. General plan cheng 2,500 ni thin chu cheng 5,000 ni tawhin Standard cheng 5,000 chu cheng 10,000 a ni tawh dawn a. Premium cheng 10,000 pawh cheng 20,000 a ni tawh dawn a ni. MUHCS hnuai inziak lut tawh zingah hian chhungkaw 12,533 hi General (cheng 2,500) hnuai inziaklut niin, chhungkaw 1,128 chu Standard (cheng 5,000) hnuai ziah luh an ni a, Premium (cheng 10,000) hnuai ah inziak lut hi chhungkaw 605 an awm tawh baw a ni. MUHCS inziahlun hun hi April atanga June thleng hawn niin, Sawrkar chhinchhiah danin inziak lut te hi

Aizawl East, Aizawl West, Champhai, Kolasib, Lawngtlai, Lunglei, Mamit, Serchhip leh Siaha District aṅang inziaklut te an ni a,

MUHCHS inziah luhna atana sum lut hi a vaiin cheng nuai 430 sing 2 sang 2 leh 500 a tlingkhawm tawh a ni. MUHCS hnuai inziak lut zingah Aizawl East aṅanga inziak lut tam berin chhungkaw 4,276 an in ziak lut a, hetihlai hian Mamit district aṅanga inziaklut hi chhungkaw 194 chauh awmin inziah luh tlemna ber District a ni.

(Corr)

<><><>

ASSEMBLY BAC

Tun thla ni 27 atanga tan tur Mizoram legislative assembly fur thutkhawm hun hman dan tur duangtu Business Advisory Committee (BAC) chu kar leh Nilaini, August ni 6 khian an thukhawm ang.

Assembly Secretariat atanga Akashvani Aizawl-in thu a dawn danin sorkar atangin dan siam thar tur emaw dan dinglai siamthat tur rawtna emaw engzat nge lo lut dawn a la hriat theih rih loh a. BAC thutkhawm hunah chuan a tlangpui hriat theih tawh tura ngaih a ni. Environment, Forests & Climate Change atangin official resolution putlul tur pakhat a luh tawh thu dawn a ni. Puan tawh angin larsap Gen. Vijay Kumar Singh chuan state legislative assembly fur thutkhawm hi August ni 27 atanga tan turin a ko a. Assembly speaker Pu Lalbiakzama kaihhruai, legislature party hrang hrang aiawhte telna BAC hian assembly inkhawm rei zawng tur leh hun hman dan tlangpui a duang dawn a ni.

Tuna assembly fur thutkhawm lo awm tur hi assembly 9-na vawi 5 thutkhawmna tur a ni.

(DESK)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MNF

MNF chuan ZPM sawrkarin kum khat leh a chanve chhung lekin Reserve Bank of India (RBI) leh hmundang atangin cheng vaibelchhe 6,424 leh nuai 74 a puk hman tawh a, thla tin nuai 35,693 puk reng ang a ni, an ti.

Wawiina Aizawl Hnam Run-a MNF chhung inkhawmah an party general secretary Pu Zodinpuia chuan ZPM in sawrkarna an chan atangin Mizoram chu a hnungtawlh zawng hlin a kal a, sum puk leh ramchhung mipuite atanga chhiah lak bak; hmundang atanga Mizoram hmasawna tur dapchhuah ngaihna a hre lo a ti a. Kum 2023 December ni 8 a ZPM sawrkar laklul a nih atangin RBI ah cheng vbc. 4,233 leh nuai 49 a puk tawh a, hmundang (NABARD, EAP, SASCI, NDCDC-te) atangin cheng vbc. 2,191 leh nuai 25 zet an puk tawh baw. Kum khat leh a chanve chhung lek a ZPM sawrkar sum puk hi cheng vbc. 6,424 leh nuai 74 a tling tawh a ti. Thla tin vaibelchhe 356 leh nuai 93 puk reng ang a ni, a ti baw a. Heti chung hian sawrkar hmasain a tihduh loh mipui fairelbel rawk zawngin chhiah tam tak an la a, buhfai man an tipung a, petrol leh diesel man an tisang a. Tuialhthei atanga chhiah an lak ringawt pawh nuai 5,109 zet a chuang tawh niin a sawi a. He'ng pawisate hi mipui sum a nih avangin a hmanna dik tak puang turin sorkar a phut a ni.

Pu Zodinpuia chuan kawng chhia avanga Mizoram harsatna tawh chungchang ah mawphurtu diktak chu Chief Minister, Finance Department changtu leh PWD Minister an ni, a ti a. State dang a thil thleng ni se chu mipuiin a mawphurtute hi bang turin an nawr nasa tawh hle ang a ti. Thal hun chhung zawng Mizoram sawrkar enkawlina hnuai NH 06 (Kawnpui - Khamrang) a awm a, Furlpui tlak tawh hnu, July ni 7 ah NHIDCL kutah Mizoram sawrkarin a hlan

ve chauh a ni a ti a. Kawngchhia avanga nitin a inhlawhfa miharsa zawkte'n hnathawh tur an nei lo rei tawh a ni tiin, Covid-19 hripui lenlai a MNF sawrkarin mipui hnena buhfai a thlawn a a sem ang khan LESDE Department hnuai Labour cess tlingkhawm atangin kuthnathawk miharsa zawkte tanpuina pe turin sawrkar a ngen a ni.

MNF general secretary chuan ZPM sawrkar hnu a Chief Minister, Minister leh MLA ten an hamthatna tur an siambelh chu cheng nuai 2,480 zet a ni. Chuti chung chuan mipuite chu a rawk theihna a piangah an rawk a, ram rorelna a enchhin sawrkar neih pawl zia mipuiten an hre dawn chauh a ni, a ti.

(DESK)

<><><>

MPCC

MPCC president Pu Lal Thanzara chuan rorellai ZPM bakah eptu MNF leh BJP te chu Kristian-te thlavang hauh lovah a puh.

Vawiina Aizawl Congress Bhavan-a MPCC Political session-ah he thu hi sawiin Pu Lal Thanzara chuan Kerala a rawngbawltu hmeichhe puithiam 2 te chu Chhattisgarh ah BJP firfiakten dawtin Kristiana inleh luih tir tum angin an puh bakah mihring ruk bo tum angin an puh niin a sawi a. Congress hruaitu KC Venugopal te, Saleng A Sangma leh Priyanka Gandhi ten Kristian rawngbawltute tan an thlavang hauhin an au a ni a ti a. Hetih lai hian Mizoram CM leh Lok Sabha leh Rajya Sabha MP-te chu rawngbawltute thlavang hauh hian an au chhuak ve lo ni a sawiin vanduai thlak a tih thu a sawi a. He thil thkeng hi vanduaithlak a tih thu leh a dem thu sawiin, hmeichhe rawngbawltu pahnihte hi chhuah turin a ngen tih a sawi a ni.

CM hlui Pu Lal Thanhawla khan Kristian te tawrhna a thlenin rawngbawltute thlavang hauhin a au chhuak thin a, President leh PM hnenah te lehkha ziakin hma a lo la tawh thin ni a sawiin India rama Kristian-te'n an thlamuanpui hle thin a ni a ti. BJP chu an sual ngawr ngawr pawh a ni hran lova, an talhfiak Sangh Parivar pawlte erawh chu missionary te tan an tawrhhlawm em em a ni a ti.

BJP President thar, Dr. K. Beichhua pawh kohhran upa a ni chungah hetiang huna ngawi leh si-ah a puh a. Politics khelhnaah pawh hian sawi nawn leh duh thin chu ram, hnam leh sakhua a him em tih thupui bera neih a ngai a ni a ti a. Enchhin Sorkar ti a a sawi ZPM-ah hian BJP president Pu Beichhua hi Dy. CM ah dah ni se la chuan BJP sorkar lei malsawmna tam tak Mizoramin a dawn phah ngei ngei a a rin thu a sawi a. An tihduhloh chhung chu Mizoram hi sum leh paiah hrekin a awm dawn niinni a a hriat thu leh a vanduaithlak thu a sawi a. Fing thar thutin Pu Beichhua hi Dy. CM ah dah thut se la, lei malsawmna chu dawng chungin kohhran miten thlarau malsawmna ramin a dawng ang em tih erawh chu ngaihtuah ngun a ngai hle dawn a ni, a ti bawk.

(PR)

<><><>

VICE PRESIDENT ELECTION

Election Commission of India chuan Vice President thlan hun atan thlaleh September ni 9 a ruat. Thla hmasaa Vice President Jagdeep Dhankar a ban avangin Vice President thar hi thlan a ngai dawn a. Tun tuma thlan tur Vice President 17 na tur a ni ang. Vice President hi electoral college ten an thlang thin a. Electoral college ah hian Lok Sabha leh Rajya Sabha memberte an tel a ni.

Tun thla ni 7 ah inthlan chungchang hriattirna tihchhuah a ni ang a. Inthlan chuh tumte tan tun thla ni 21 thleng hun hawn a ni a. Nomination thehluh hi a tuk August ni 22 ah endik a ni ang a. NI 25 thleng inhnudawhna hun a awm ang a. Vote tla te hi September ni 9 ah chhiar a ni ang.

(Newsonair)

<><><>

PARLIAMENT

Vawiin Parliament in hnih rorel inkhawm chu opposition ten rorel thei lova an siam avangin vawiin atan inkhawm tihtawp a ni. Rajya Sabha ah chuan opposition ten Bihar Special Intensive Revision of Electoral Roll chungchang leh thildang sawiho an ngiat avangin chhun dar 12a an lukhawm hnu reiloteah a titawp zui a ni.

(Newsonair)

<><><>

EX MP CONVICTED

Bengaluru Special Court chuan Janata Dal (Secular) hruaitu leh MP hlui Prajwal Revanna chu pawngsual thubuaiah thiamloh a chantir. Pawngsual thubuai pali a neih mek zinga pakhatah Prajwal Revanna hi thiamloh chantir a ni a. Additional City Civil and Session Judge Santhosh Gajanan Bhat chuan vawiin khan a thurem dan hi a ti chhuak a. Pawngsual, hurna lam kaihnawiha inehhah leh pawikhawihna thubuaiah thiamloh chantir vek a ni a. Pawngsual tuartu hi Revana chhungkaw thlama hnathawk a ni a. Kum 2021- Covid hri len lai khan vawi tam tak a pawngsual niin a sawi a. Kumin May ni 30 khan SIT chuan Prime Minister hlui leh JD (S) hotupa Deve Gowda tupa Prajwal Revanna hi an man a ni.

(Nwsonair)

<><><>